



Broj: UP09-07-1-89/19
Sarajevo, 01.10.2019. godine

Ministarstvo pravde Bosne i Hercegovine, rješavajući Zahtjev „Asocijacije kompozitora-muzičkih stvaralaca“, sa sjedištem u Sarajevu, ulica Trg solidarnosti broj 2a, zastupane po punomoćniku Kadić S. Sulejmanu, advokatu iz Sarajeva, za upis promjena u Registru udruženja, na osnovu člana 34. stav 1. Zakona o udruženjima i fondacijama Bosne i Hercegovine ("Službeni glasnik BiH", br: 32/01, 42/03, 63/08, 76/11 i 94/16)(u daljem tekstu: Zakon) i člana 4. stav (1) Pravilnika o načinu vođenja registra udruženja i fondacija Bosne i Hercegovine i stranih i međunarodnih udruženja i fondacija i drugih neprofitnih organizacija («Službeni glasnik BiH», broj 44/10 i 14/12) (u daljem tekstu: Pravilnik), donosi

RJEŠENJE

Odbacuje se Zahtjev „Asocijacije kompozitora-muzičkih stvaralaca“, sa sjedištem u Sarajevu, ulica Trg solidarnosti broj 2a, od 16.01.2019. godine, za upis promjena u Registru udruženja kod Ministarstva pravde Bosne i Hercegovine.

Образложење

„Asocijacija kompozitora-muzičkih stvaralaca“, sa sjedištem u Sarajevu, ulica Trg solidarnosti broj 2a (u daljem tekstu: Asocijacija), upisana je u Registar udruženja kod Ministarstva pravde Bosne i Hercegovine, pod registarskim brojem: RU-28/02, Knjiga I Registra, dana 12.09.2002. godine.

Asocijacija je 16.01.2019. godine podnijela Zahtjev za upis promjena u Registru udruženja ovog Ministarstva.

Imajući u vidu da je Asocijacija, zastupana po ovlaštenim punomoćnicima, povodom Rješenja ovog Ministarstva, Broj: UP09-07-1-1003/18 od 12.07.2018. godine, pokrenula upravni spor tužbom pred Sudom Bosne i Hercegovine, te da je upravni spor bio u toku, postupak upisa izmjena i dopuna u Registru udruženja, pokrenut po Zahtjevu AMUS-a, u predmetu Broj: UP09-07-1-89/19 od 16.01.2019. godine, bio je prekinut do pravomoćnog okončanja prednjeg postupka koji se vodio na Sudu BiH, broj predmeta: S1 3 U 029714 18 Fp od 19.09.2018.godine.

Prednji postupak upisa izmjena i dopuna u Registru udruženja prekinut je Zaključkom Ministarstva, Broj: UP09-07-1-89/19 od 04.02.2019. godine, a na temelju odredbe člana 135. stav (1) Zakona o upravnom postupku („Službeni glasnik BiH“, br. 29/02, 12/04, 88/07, 93/09, 41/13 i 53/16).

Dana 13.06.2019. godine Ministarstvo pravde Bosne i Hercegovine zaprimilo je Presudu Suda Bosne i Hercegovine, Broj: S1 3 U 029714 18 U od 01.06.2019. godine, kojom se odbija tužba tužitelja „Asocijacija kompozitora-muzičkih stvaralaca“, zastupane po punomoćnicima Zajedničkoj advokatskoj kancelariji Jasmir Muratović, Tanja Hadžagić, Ilvana Bijedić, povodom Rješenja ovog Ministarstva, Broj: UP09-07-1-1003/18 od 12.07.2018. godine.

Imajući u vidu da je odredbom člana 139. stav (1) Zakona o upravnom postupku propisano da se postupak, prekinut zbog rješavanja prethodnog pitanja kod nadležnog organa, u ovom slučaju Suda BiH, nastavlja pošto rješenje doneseno o tom pitanju postane konačno, to je postupak po Zahtjevu Asocijacije za izmjene i dopune registracije u Registru udruženja, nastavljen na temelju odredbe člana 34. stav 1. Zakona o udruženjima i fondacijama Bosne i Hercegovine.

U nastavku postupka Ministarstvo je utvrdilo da zahtjev nije potpun, te da sadrži nedostatke i nepravilnosti zbog kojih nije moguće izvršiti upis promjena u Registru udruženja. Ministarstvo je aktom, Broj: UP09-07-1-89/19 od 17.07.2019. godine zatražilo ispravku i dopunu zahtjeva. Navedenim aktom, podnosilac zahtjeva je upućen u kom dijelu je potrebno izmijeniti i dopuniti zahtjev, te da će Ministarstvo rješenjem odbaciti Zahtjev za upis promjena u Registru udruženja, ukoliko podnosilac zahtjeva ne otkloni nedostatke u predviđenom roku.

Podnosilac zahtjeva je podneskom od 23.08.2019. godine dostavio slijedeće: Obrazac 2 (Zahtjev za izmjene i dopune registracije udruženja); Punomoć za advokata od 19.08.2019. godine; Spisak redovnih članova Asocijacije; prijepis Zapisnika sa sjednice Skupštine Asocijacije od 05.12.2018. godine sa vlastoručnim potpisima prisutnih redovnih članova Asocijacije, sačinjen od notara Čatović Kaseme; Spisak

redovnih članova Asocijacije prisutnih sjednici Skupštine 17.12.2018. godine, sa prilogom originalnih vlastoručnih potpisa; Zapisnik sa Skupštine Asocijacije održane 17.12.2018. godine; Odluku o razrješenju i imenovanju organa Asocijacije, Broj: 07/19 od 17.12.2018. godine; ovjerene vlastoručne potpise i fotokopije ličnih karti imenovanih lica ovlaštenih za zastupanje Asocijacije u pravnom prometu (predsjednika Skupštine i predsjednika Upravnog odbora Asocijacije); ovjerene fotokopije ličnih karti članova Upravnog odbora Asocijacije, te izjave o prihvatanju članstva u ovom organu Asocijacije; dokaze podnosioca Zahtjeva, numerisane brojevima od 1. do 6., te dokaz o uplati administrativne takse

Uvidom u dostavljene dokaze utvrđeno je da podnosilac zahtjeva nije u cjelosti postupio prema Obavještenju Ministarstva, iz slijedećih razloga:

Spisak redovnih članova Asocijacije ne sadrži sve podatke propisane članom 15. stav 2.a), b), c) i d) Zakona, kako je to naloženo u tački 2. Obavještenja Ministarstva, Broj: UP09-07-1-89/19 od 17.07.2019. godine, odnosno ne sadrži adrese prebivališta članova Asocijacije, datum pristupanja i broj pristupnice, vrstu članstva sukladno Statutu Asocijacije i datum prestanka članstva.

Asocijacija, prema važećem Spisku redovnih članova Asocijacije iz decembra 2018. godine, ima 1105 redovnih članova.

Uvidom u važeći Statut Asocijacije, Broj: 01/16 od 15.02.2016. godine, utvrđeno da je odredbom člana 21. stav 6. i dalje, jasno propisan način sazivanja sjednica Skupštine Asocijacije, kvorum i pravila glasanja. U članu 21. stav 12. navedenog Statuta propisano je slijedeće: „*Kvorum Skupštine čini 10% redovnih članova Udruženja iz člana 11. ovog Statuta.*“ Primjenom ove odredbe, a u vezi sa dostavljenim Spiskom redovnih članova Asocijacije iz decembra 2018. godine, zaključuje se da je za održavanje i punovažno odlučivanje Skupštine Asocijacije neophodno prisustvo najmanje 111 redovnih članova Asocijacije.

Uvidom u prijepis Zapisnika sa sjednice Skupštine Asocijacije od 05.12.2018. godine sa vlastoručnim potpisima prisutnih redovnih članova Asocijacije, sačinjen od notara Čatović Kaseme, utvrđeno je da je sjednici prisustvovalo ukupno 126 redovnih članova Asocijacije i svojim vlastoručnim potpisom na spisak to i potvrdilo.

Iz prednjeg proizilazi da je na sjednici Skupštine Asocijacije održane 05.12.2018. godine postojao kvorum za održavanje i punovažno odlučivanje Skupštine Asocijacije, te stoga nema pravnog osnova ni uporišta za primjenu odredbe člana 21. stav 14. Statuta Asocijacije, na temelju koje je sazvana i održana nova sjednica Skupštine Asocijacije dana 17.12.2018.godine. Naime, odredba člana 21. stav 14. Statuta Asocijacije glasi: „*Ukoliko se utvrdi da ne postoji kvorum iz prethodnog stava, predsjednik Skupštine konstatuje da nisu ispunjeni uslovi za održavanje i punovažno odlučivanje Skupštine, te zakazuje novu sjednicu Skupštine, u roku koji ne može biti kraći od 3 ni duži od 15 dana.*“

Slijedom prednjeg, nije ispunjen formalno-pravni uslov za primjenu odredbe člana 21. stav 15. Statuta Asocijacije, koja glasi: „*Kvorum za novu sjednicu Skupštine čini 5% redovnih članova Udruženja*“ na temelju koje je zakazana i održana nova sjednica Skupštine Asocijacije dana 17.12.2018.godine, a kojoj je prisustvovalo ukupno 66 redovnih članova Asocijacije, koji su svojim vlastoručnim potpisima na spisku to i potvrdili.

Također, Asocijacija u toku postupka nije dostavila dokaz da je Upravni odbor Asocijacije održao sjednicu ovog organa sukladno odredbama Statuta Asocijacije, da postoje uslovi za punovažno odlučivanje, niti da je punovažnu odluku o sazivanju sjednice Skupštine Asocijacije donio Upravni odbor Asocijacije.

Imajući u vidu sve naprijed izloženo, svi akti usvojeni na sjednici Skupštine Asocijacije od 17.12.2018. godine ne mogu se smatrati punovažnim niti proizvoditi pravno dejstvo.

Iz prednjeg proizilazi da podnosilac Zahtjeva nije u cjelosti postupio po Obavještenju Ministarstva, Broj:UP09-07-1-89/19 od 17.07.2019. godine, te da su ispunjeni uslovi iz člana 34. stav 1. Zakona o udruženjima i fondacijama Bosne i Hercegovine, na osnovu čega je odlučeno kao u dispozitivu Rješenja.

Na ovo Rješenje naplaćena je administrativna taksa u iznosu od 50,00 KM u skladu sa TAR.Brojem 108. Odluke o dopuni tarife administrativnih taksi, („Službeni glasnik BiH“ broj: 73/17).

Pouka o pravnom lijeku:

Protiv ovog rješenja nije dopuštena žalba, ali se može pokrenuti upravni spor tužbom pred Sudom Bosne i Hercegovine. Rok za podnošenje tužbe je 60 dana od dana prijema ovog rješenja.

Dostavljeno:

- ADVOKAT SULEJMAN S. KADIĆ za „Asocijaciju kompozitora-muzičkih stvaralaca“
Ulica Jadranska broj 1, 71 000 SARAJEVO;
- Zbirka isprava.

